

REES, EVAN ('Dyfed'; 1850 - 1923), pregethwr, bardd, ac archdderwydd Cymru

Enw: Evan Rees
Ffugenw: Dyfed
Dyddiad geni: 1850
Dyddiad marw: 1923
Rhiant: Eunice Rees
Rhiant: James Rees
Rhyw: Gwryw
Galwedigaeth: pregethwr, bardd, ac archdderwydd Cymru
Maes gweithgaredd: Crefydd; Eisteddfod; Barddoniaeth
Awdur: James Ednyfed Rhys

Ganwyd 1 Ionawr 1850 yn Casmael, Sir Benfro, mab James ac Eunice Rees. Symudodd y teulu i Aberdâr pan nad oedd y mab ond naw mis oed. Ni chafodd fawr addysg. Gweithiai yng nglafa Blaengwawr, Aberdâr, yn 8 mlwydd oed. Symudodd i Gaerdydd pan yn 23 mlwydd oed. Dechreuodd bregethu yn eglwys Seion (Methodistiaid Calfaidd), Caerdydd (Pembroke Terrace wedi hynny). Daeth i sylw fel bardd yn gynnar ar ei oes. Enillodd y prif wobrau mewn eisteddfodau taleithiol a chenedlaethol, e.e. eisteddfodau cenedlaethol Merthyr Tydfil, 1881, ar ' Cariat '; Lerpwl, 1884, ar ' Gwilym Hiraethog '; Aberhonddu, 1889, ar ' Y Beibl Cymraeg '; Merthyr Tydfil eilwaith yn 1901 ar ' Y Diwygiwr '; eisteddfod gyd-genedlaethol Chicago, 1893, ar ' Iesu o Nazareth.' Beirniadai bron bob blwyddyn yn yr eisteddfod genedlaethol yn ystod 40 mlynedd olaf ei fywyd. Gwasnaethodd fel archdderwydd yng Ngorsedd y Beirdd am 21 mlynedd. Enillodd le amlwg fel pregethwr, a gelwid ef i'r prif wyliau ar hyd blynyddoedd anterth ei nerth. Teithiodd ar hyd Ewrop, Affrica, rhannau o Asia, a'r Unol Daleithiau. Enillodd sylw mawr fel darlithiwr a thramwyodd y wlad i draethu ar ' Beirdd a Barddoniaeth,' ' Islwyn,' ' Ann Griffiths,' ' Pantycelyn,' ' Dros Gyfanfor a Chyfanfyd,' ' Gwlad y Pyramidiau,' ' Gwlad Canaan,' ' Gwlad y Dyn Du.' Golygodd *Y Drysorfa* o 1918 hyd 1923. Cyhoeddodd *Caniadau Dyfedfab*, *Gwaith Barddonol Dyfed*, dwy gyfrol, *Gwlad yr Addewid a Iesu o Nazareth*, ac *Oriau gydag Islwyn*. Bu farw 19 Mawrth 1923. Brawd iddo oedd [Jonathan Rees](#).

Awdur

Y Parchedig James Ednyfed Rhys, (1876 - 1960)

Ffynonellau

Gwybodaeth bersonol

Y Goleuad, Mawrth 1923

Y Drysorfa, Ebrill 1923

Darllen Pellach

Erthygl Wicipedia: [Evan Rees](#)

Dolenni Ychwanegol

VIAF: [40177043](#)

Wikidata: [Q5415524](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.